

Aencingz Mehlgw Hoj Doxbiek

难分难舍母子情

□ Suh Cangzliuz eu Suh Dazcin cingjleix

Aenyienz baedauq gyaj lumj caen,
Cij nyienh seizhaenx mbouj baenz
vunz,

Duzroeg ndaw ndoeng gonq doxbaengh,
Ngoenzneix fanjnaj mbouj doxgaen.

Haq deng ae ngangjgyaeuj(hengzmanz),
Cuij ndaej daeuq,
Caenh gwn laeuj gvaq ngoenz,
Gou haemh ninz,
Loq fangzhwnz cungj daej.

Beg guh vunz bouxsai,
Dai ndi dai,
Caeg haeux gai cawx laeuj,
Gwn ngeviz yiemz mbouj gaeuq.

Mbouj gangj yaeuh,
Caenh raiz nyouh henz daiz.
Bouxvunz mbouj rox ngeix,
Hoj fouzbeij.

Caih gangj leix mbouj doeng,
Gou yied naemj yied loeng,
Daej da hoengz,
Mbouj rox doengzlawz(yienghlawz)
banh.

Ae beizheiq youh yak,
Baez hai bak,
Ae couh fak youh diz(dub),
Saedcaih vi(vei),
Siengj gwn mbi(mbei) yiemz cit!

Haq deng ndaek vunz neix,
Nyaengq fouzbeij,
Cungj mbouj ngeix cauhyga,
Ceng lili lala,
Lwg haeujma,
Gamz raemxda gwn haeux.

Siengj daiq lwg gaijhaq,
Ae dwk vah,
Dingh aeu gaj mbouj louz,
Lumj sim ma sim mou,

Caenh haep gou,
Saenz lumj nou lumj roeg.

Mehlgw deng nozdai,
Cungj fouznaih,
Vanzlij caiq haq vunz,
Ce lwg youq mbiengjmbwn,
Guh hong gwn,
Da ndi raen satsoq.

Ndaej doxliz okma,
Nanz yamq ga,
Gamz raemxda youh daej,
Nyeux naj yawj lwgnyaeq,
Ndek ndi ndaej,
Lwg iq daej gaenlaeng.

Lwg iq got gahoq,
Caen hojcoh(hojlien),
Lawz yamq loh okbae?
Yied ngeix sim yied ceiz(naiq),
Doxbiek bae,
Daengz geij seiz raennaj.

Lwg iq got gagoek,
Daejboegboeg,
Raemxda doek lumj fwn,
Mingh cienh mbouj doengz vunz,
Mbwn ha mbwn,
Mwngz rox raen rox mbouj.

Lwg iq beng dinvaq,
Daejnga'nga,
Naeuz meh ha gaej bae,
Yied daeuj daej yied vei,
Naeuz mwngz bae,
Gou lawz ndei cogneix.

Lwg yied daej yied genx,
Mbenj ha mbenj,
Gou lawz cienh baenzlai,
Lumj deng gyaep bae gai,
Vei lailai,
Caen nyienh dai bae liux.
Lwg daej meh hix daej,

Gvej sim saej,
Mbouj rox ndaej guh ndei,
Nanz ndek lwg okbae,
Saedcaih vei,
Nyienh gwn vei seizneix.

Ndek lwg sim nanz nyaenx,
Daej ngaebngwnx,
Gyaeuj caenh ngunh caenh fouz,
Cienz vih ndaek gvan gou,
Ndi rox you,
Haih lwg gou souh coih.

Gij vunz youq bakmbanj,
Mbingj(yawj)cancan,
Hix mbouj sanq mbouj deuz,
Lwg buet daeuj naj heu,
Sing daej veu,
Beng buh heuh doxdaug.


Vunz cungj gangjswgswg,
Lawz cijdwg(cijndei)?
Caiq umj lwg yawj baez,
Yied yawj yied dwggyaez,

Meh okbae,
Caiq mbouj meiz(miz) meh maij.

Gou mbat faemz roengzdaeuj,
Lwg ceu(itcig) nyaeu,
Got hoz gou mbouj deuz,
Cig daej ndaej naj heu,
Caih lawz heuh,
Lwg caenh ceu(itcig) ngaebngwnx.

Simjsauj raen gijneix,
Hix gaen daej,
Gvej sim saej lailai,
Coengh umj lwg gyaezgvai,
Coih lailai,
Hix laihdai hwnj loh.

Gangj lwnh beixnuengx doih,
Coih suenq coih,
Ndek lwg oiq okdou,
Simjsauj gaej gvaig gou,
Gvih gouz sou,
Lai coengh gou yawj lwg!



Raemx huz sawyau ingj fwjhaemh.

Ouh Yiz ingj

•Sawcuenhraz Lwngnyez•

Gij Golwngnyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

“Gou ngeix gij saedceij mboengneix de aiq gvaq ndaej mbouj daih ndei, couh heuh Ah Byauh soengq song geu buhvaq hawj de, gangj mbouj dingh de——”

“Daxmeh mwngz caen huk.” Meh gikdoengh ndaej dajduenh gij vah daiq, yiemzsuk naeuz, “gangj mbouj dingh yaek yinx gij mazfanz daeuj ne! Ndaek vunz neix youq ndawmbanj, dauqdaej dwg aen foeg miz doeg.”

Ndawsim gou gig mbouj doengzeiq gij vah daxmeh, hoeng mbouj gamj haibak euq, cij laeglemx byaij daengz henzndang daiq bae, dahnuegx hix ndaejnyi gij sing gangj vah daj ndawrug byaij okdaeuj.

“Gij saedceij neix ndaej bang couh lai bang de saekdi lo.”

Gou roxnyinh daiq gangj ndaej gig deng.

Gou cingq yaek laeglemx naeuz hawj daiq Aulungzgeiz lwnh hawj gou

aen goj he gig mizyinx, liuh mbouj daengz daxmeh cix maenj hwnjdaeuj lo:

“Lij mbouj bae swiq din? Haemhneix mwngz mbouj siengj hwnj congz ninz lo?”

“Bae, ndawbat miz raemxndat.” Daiq sing iq gangj, loq gaex gou haeuj ndawrug bae.

Gou mbouj gamj dwen saek coenz couh bae ra haizdaz, ndawsim gig ienq daxmeh, de maz cungj ndei, couh dwg

beizheiq gaenj lai, mizseiz maij gou couh maij yaek dai bae, lauheiq mbouj ndaej lumj lwgnding nei got gou haeuj ndawrunj bae, hoeng baez hozgaek, couh ndaq gou ndaq ndaej gyaeuj haeu bae. Mbouj lumj daiq gwq baenzneix gyaez gou, couhcinj guh saeh loek lo, daiq ceiq lai cangguh yiengh hozhwnj hat gou song coenz. Mizseiz daxmeh ndaq gou, daiq lij bang gou gangj vah' unq, ndigah ciengzseiz nyex ndaej daxmeh engq

hozgaek, ienq daiq naeuz:

“Ah Byauh cungj deng mwngz cungh ndaej mbouj baenz yiengh lo.”

“Ai, daeglan neix baenzneix ndeigyaez, guenj ndaej yiemz gvaqbouh hix mbouj dwg saeh ndei ha.”

“Seiziq mbouj guenj, caj de majhung le hwnj bya bae?”

Gou rox daxmeh gangj “hwnj bya” couh dwg naeuz bae guh caeggeq. (caengz sat)